

答言不能知正使恒河沙等一生補處菩薩
尚不能知況我一身所以者何佛有無量功
德福田甚良於中種種果報無盡待我將來
成佛乃能知之

雜藏經

餓鬼報應經

出雜藏經

失譯人名附東晉錄

尊者大目犍連從佛在耆闍崛山遊恒水邊
見諸餓鬼甚多受罪不同見尊者目連皆起
敬心來問因由一鬼問言我常苦頭痛不知

何罪所致目連答言汝本為人時不能修善
以杖打衆生頭今受華報果在地獄一鬼問
言我常患瘡痛何罪所致目連答言汝為人
時無有慈心焚燒山林殘害衆生今受華報
果在地獄一鬼問言我舉身瘡爛痛不可堪
聖九
何罪所致答言汝為人時生燔猪羊今受華
報果在地獄一鬼問言我食無有足時初不
得飽何罪所致答言汝為人時雖飯食衆生
初不令足今受華報果在地獄一鬼問言我
苦頭痛治之叵差何罪所致答言汝為人時

不敬道德加以罵辱今受華報果在地獄一鬼問言我生男女皆悉端正而皆早死念之斷絕何罪所致答言汝爲人時見兒殺生助其歡喜共噉其肉殺故短命喜故痛毒今受華報果在地獄一鬼問言我有一夫而畜多婦我應直宿而不見納何罪所致答言汝爲人時不敬夫主邪淫無禮今受華報果在地獄一鬼問言我常頭痛而男根瘡爛何罪所致答言汝爲人時於塔廟清淨之處行姪今受華報果在地獄一鬼問言我得此身麤澁

不淨何罪所致答言汝爲人時不尊有德輕賤善人而以沙土撒塗沙門今受華報果在地獄一鬼問言我食不啻一斛而常不足何罪所致答言汝爲人時本作比丘爲僧求物而以自食今受華報果在地獄一鬼問言我受此形脚腫項癭何罪所致答言汝爲人時使人及諸畜生負重無道今受華報果在地獄一鬼問言我受此身常患熱渴何罪所致答言汝爲人時喜好漁獵以所得魚投之沙土令其苦死今受華報果在地獄一鬼問言

室九

十五

我受此身癡狂無知何罪所致答言汝爲人時以酒施人今受華報果在地獄一鬼問言我所生子皆反噉我何罪所致答言汝爲人時不修孝養今受華報果在地獄一鬼問言我食常吐何罪所致答言汝爲人時有人中後索食者汝瞋詈而與今受華報果在地獄一鬼問言我今一生資財無乏而樂著弊故何罪所致答言汝爲人時雖好布施施後尋悔今受華報果在地獄一鬼問言我今一形恒倚巷陌宿無常處何罪所致答言汝爲人

時客來投止而不安隱見他客止而復瞋罵今受華報果在地獄一鬼問言我得此形非男非女何罪所致答言汝爲人時而無慈心好殺六畜今受華報果在地獄一鬼問言我得此身臂不能行何罪所致答言汝爲人時好行無道拘繫於人及以禽獸令不得行今受華報果在地獄一鬼問言我此一身常患熱渴行見恒河清涼甚好入中洒浴冀得涼樂以除熱苦方入其中舉身爛壞渴欲飲之一口入咽五藏焦爛肌肉離骨何罪所致答

言汝爲人時好爲相師相人吉凶少實多虛
或毀或譽自稱有德以動人心以求利養又
於父母兄弟宗親諂僞不實今受華報果在
地獄憂苦叵言說不可盡也一鬼問言我受
身已來常有一狗體大牙利兩目赫赤晝夜
常來而噉我身命未盡頃肉便復生復受此
苦痛不可堪忍何罪所致答言汝爲人時作
天祠主於天祠中取牛羊血以祀於天自食
其肉語衆人言汝等祠祀大得吉利作惡邪
罪以惑百姓今受華報果在地獄一鬼問言

壁九

十六

我受此身常處不淨舉身塗漫有所噉食皆
是不淨恒受此苦不能得離臭惱纏身憂患
叵計何罪所致答言汝爲人時作婆羅門不
信佛法不樂供養沙門道人客來乞求恒不
欲見時有一道人來從汝乞汝作是念當作
方便令不復來即取鉢盛屎著下以飯覆上
持與道人得已還至本處持著一面淨洒手
訖坐而執鉢取飯食之鉢中不淨臭不可近
以是因緣受此臭惱今受華報果在地獄當
吞鐵丸身體爛壞苦不可言一鬼問言我受

此身處處舌出有自然斧而斬截之如是無數何罪所致答言汝爲人時作小道人爲僧所差取清淨水作石蜜漿分與衆僧石蜜堅大打取少許而盜食之一口盜僧物故今受華報果在地獄吞於洋銅苦不可說一鬼問

壁九

十七

言我受此身常苦飢餓徃至廁上欲取屎食廁上有大力鬼以杖打我初不得近何罪所致答言汝爲人時曾作道人爲佛圖主悵護僧物不以好食供養衆僧常以麤惡與之或時欲作好食見客比丘來便止不作待去乃

設惡心慳惜今受華報果在地獄一鬼問言我受此身腹大如瓮餘身分皆小咽如針孔不得下食何罪所致答言汝爲人時作聚落主自恃豪強欺凌人民常以無道索人飲食以苦百姓今受華報果在地獄一鬼問言我受此身肩上有銅瓶滿中洋銅手提一杓以酌取之自灌其頭舉身焦爛如是無數苦痛無量何罪所致答言汝爲人時出家修道知僧飲食取一酥瓶藏著餘處客道人來而不與之客去出酥瓶行與舊僧此酥是招提僧

物一切有分以隱匿僧物與不平等以是因緣得如是苦今受華報果在地獄苦痛難計一鬼問言我受此身常有人來持諸刀鋸剝刺我身又破我腹出其五藏肉盡筋斷痛不可忍受須臾之間肉生平復尋復來割何罪所致答言汝爲人時作婆羅門不信正法常生邪見奉事天神恒以牛羊禱祀以是罪故今受此苦此是華報果在地獄一鬼問言我受此身常有人來持諸刀鋸剝我身又破其腹出其五藏肉盡筋斷苦切叵忍須臾之

間肉生平復尋復來割何罪所致答言汝爲人時常作魁膾主知殺人無有慈心歡喜行之有如是罪得此苦痛今受華報果在地獄一鬼問言我受此身兩腋下恒有熱鐵輪行時輪轉火熱逼身兩腋下焦爛何罪所致答言汝爲人時出家學道與僧種種餅僧未下食汝時貪心盜取僧餅藏著腋下屏處食之以是因緣得如是苦今受華報果在地獄受苦難量一鬼問言我受此身常有自然赤鐵丸從空中下入口至腹或左出右入右出左

壁九

十八

入舉身焦爛無量何罪所致答言汝爲人時
出家爲沙彌爲僧者爰羅果僧中行之至和
上前長與七枚以是因緣故得惡苦今受華
報果在地獄一鬼問言我受此身意欲行來
發動迴還猶如旋風初不得前愁惱悶苦不
可稱計何罪所致答言汝爲人時作卜問師
詭誑他人令心幻惑或喜或怖皆不真實由
此因緣得如是惡今受華報果在地獄一鬼
問言我受此身內常有熱猶懷湯火復來燒
責苦痛萬端何罪所致答言汝爲人時作國

王第一夫人時王偏敬小夫人汝常生嫉心
作惡方便求欲殺之伺其卧時煮酥令熱注
著腹上其人得此苦痛無量遂致命終由是
因緣得如是苦今受華報果在地獄一鬼問
言我受此身性多恐怖常畏人來收閉繫縛
加諸楚毒初無歡心何罪所致答言汝爲人
時好行邪淫犯人婦女常畏發覺心不自寧
今受華報果在地獄或卧鐵牀或抱銅柱如
是之罪不可稱計一鬼問言我受此身自然
熱鐵而有籠網纏絡我身燒熱焦爛痛毒叵

壁九

十九

言何罪所致答言汝為人時常持罽網殺諸魚獸籠取飛鳥以是因緣得如是苦切今受華報果在地獄一鬼問言我受此身無有手足如一段肉在於曠野孤狼虎豹鵩鷲衆鳥競來搏撮爭共食之苦痛叵言何罪所致答言汝為人時作惡方便若已若他妊娠之時即便與藥令胎消化由是因緣得如是苦今受華報果在地獄又三鬼一時來問言我受此身常有鐵釘從空中下釘我身上入肌破骨痛毒徹髓何罪所致答言汝為人時一人

作馬師一人作牛師一人作象師苟貪他財鍼刺無道使受痛苦而不除痛由是因緣得如是苦今受華報果在地獄一鬼問言我受此身無有頭首眼耳鼻口盡在胷前何罪所致答言汝為人時若見殺人與之捉頭歡喜而挽無有慈心由是因緣得如是身今受華報果在地獄目連答諸鬼已皆生敬心走前懺悔目連見其歡喜更爲說法諸鬼聞已皆大歡喜

餓鬼報應經

